

**««Օրգանական գյուղատնտեսության մասին»
օրենքում փոփոխություններ և լրացումներ
կատարելու մասին» Հայաստանի
Հանրապետության օրենքի նախագծի ընդունման,
««Հայաստանի Հանրապետության կառավարության
2009 թվականի հունիսի 26-ի n 704-Ն որոշման մեջ
լրացումներ և փոփոխություններ կատարելու
մասին» Հայաստանի Հանրապետության
կառավարության որոշման նախագծի ընդունման**

ՆԱԽԱԳԻԾ

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ

Օ Ր Ե Ն Զ Ը

**«ՕՐԳԱՆԱԿԱՆ ԳՅՈՒԴԱՏՆԵՍՈՒԹՅԱՆ ՄԱՍԻՆ» ՕՐԵՆՔՈՒՄ
ՓՈՓՈԽՈՒԹՅՈՒՆՆԵՐ ԵՎ ԼՐԱՑՈՒՄՆԵՐ ԿԱՏԱՐԵԼՈՒ ՄԱՍԻՆ**

Հոդված 1. «Օրգանական գյուղատնտեսության մասին» 2008 թվականի ապրիլի 8-ի ՀՕ-23-Ն օրենքի (այսուհետ՝ Օրենք) 3-րդ հոդվածի 1-ին մասի 14-րդ կետում «:» կետադրական նշանը փոխարինել «.» կետադրական նշանով:

Հոդված 2. Օրենքի 3-րդ հոդվածի 1-ին մասը լրացնել նոր 15-րդ կետով՝ հետևյալ բովանդակությամբ.

«15) **ազգային ստանդարտ**՝ ստանդարտացման ազգային մարմնի կողմից ընդունված և հանրությանը հասանելի ստանդարտ:»:

Հոդված 3. Օրենքի 5-րդ հոդվածի 1-ին մասի 6-րդ, 7-րդ և 8-րդ կետերն ուժը կորցրած ճանաչել:

Հոդված 4. Օրենքի 6-րդ հոդվածի 1-ին մասի 5-րդ կետում «ակտեր» բառից հետո լրացնել «, ներգրավվում է ոլորտային ստանդարտների մշակման և ստանդարտների նախագծերի փորձաքննության աշխատանքներում»

Հոդված 5. Օրենքի 7-րդ հոդվածը լրացնել նոր 4-րդ մասով՝ հետևյալ

բովանդակությամբ.

«4. Հայաստանի Հանրապետությունում «օրգանական» կամ «անցումային շրջանի օրգանական» արտադրանքի արտադրությունը, վերամշակումը, պիտակավորումը և շուկայավարումն իրականացվում է համաձայն՝ ՀՍՀ 370-2015 «Օրգանական սննդամթերքի արտադրության, վերամշակման, պիտակավորման և շուկայավարման դեկլար ցուցումներ» ազգային ստանդարտի:»:

Հոդված 6. Օրենքի 8-րդ հոդվածն ուժը կորցրած ճանաչել:

Հոդված 7. Օրենքի 9-րդ հոդվածի վերնագրից հանել «և պիտակավորումը» բառերը, իսկ 2-րդ մասից՝ «գյուղատնտեսական արտադրանքի, ինչպես նաև օրգանական գյուղատնտեսության անցումային շրջանում գտնվող արտադրանքի մակնշման և պիտակավորման կարգը, ինչպես նաև օրգանական» բառերը:

Հոդված 8. Օրենքի 9-րդ հոդվածի 6-րդ մասում «մակնշման կարգը սահմանում է Հայաստանի Հանրապետության կառավարությունը» բառերը փոխարինել «մակնշումն իրականացվում է համաձայն ազգային ստանդարտի» բառերով:

Հոդված 9. Օրենքի 10-րդ հոդվածը լրացնել նոր 6-րդ մասով՝ հետևյալ բովանդակությամբ.

«6. Հայաստանի Հանրապետությունում օրգանական գյուղատնտեսական գործունեություն ծավալող և արտահանող տնտեսավարող սուբյեկտները, որոնց արտադրանքը՝ որպես «օրգանական» կամ «անցումային շրջանի օրգանական» սերտիֆիկացվում է այլ երկրի սերտիֆիկացնող մարմնի կողմից, ևս ենթակա են գրանցման օրգանական գյուղատնտեսությամբ զբաղվող տնտեսավարող սուբյեկտների հաշվառման գրանցամատյանում:»:

Հոդված 10. Եզրափակիչ մաս և անցումային դրույթներ

1. Սույն օրենքն ուժի մեջ է մտնում պաշտոնական հրապարակմանը հաջորդող օրվանից:

2. Սույն օրենքից բխող ենթաօրենսդրական նորմատիվ իրավական ակտերում անհրաժեշտ փոփոխությունները և լրացումներն ընդունվում են սույն օրենքն ուժի մեջ մտնելուց հետո՝ 90 օրացուցային օրվա ընթացքում:

ՆԱԽԱԳԻԾ

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅՈՒՆ

Ո Ր Ո Շ ՈՒ Մ

----- 2025 թվականի N ----- -Ն

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅԱՆ 2009 ԹՎԱԿԱՆԻ ՀՈՒՆԻՍԻ 26-Ի N 704-Ն ՈՐՈՇՄԱՆ ՄԵՋ ՓՈՓՈԽՈՒԹՅՈՒՆՆԵՐ ԿԱՏԱՐԵԼՈՒ ՄԱՍԻՆ

Հիմք ընդունելով «Նորմատիվ իրավական ակտերի մասին» օրենքի 33-րդ և 34-րդ հոդվածները՝ Հայաստանի Հանրապետության կառավարությունը **որոշում է.**

1. Հայաստանի Հանրապետության կառավարության 2009 թվականի հունիսի 26-ի «Օրգանական գյուղատնտեսության ոլորտում համապատասխանության սերտիֆիկատ տալու կարգը և օրգանական գյուղատնտեսական արտադրանքի համապատասխանության նշանի, համապատասխանության սերտիֆիկատի ձևերը հաստատելու մասին» N 704-Ն որոշման (այսուհետ՝ Որոշում) մեջ կատարել հետևյալ փոփոխությունները.

- Որոշման N 2 հավելվածը շարադրել նոր խմբագրությամբ՝ համաձայն հավելվածի.
- N 3 հավելվածում տարբերանշանը փոխարինել սույն որոշման 1-ին կետի 1-ին ենթակետով նոր խմբագրությամբ շարադրվող N 2 հավելվածի տարբերանշանով, իսկ ամբողջ տեքստում «200» թվերը փոխարինել «20» թվերով:

2. Սույն որոշումն ուժի մեջ է մտնում պաշտոնական հրապարակմանը հաջորդող օրվանից:

Հավելված

ՀՀ կառավարության 2025 թվականի

«Հավելված N 2

ՀՀ կառավարության 2009 թվականի

հունիսի 26-ի N 704-Ն որոշման

Ձև

**ՕՐԳԱՆԱԿԱՆ ԳՅՈՒՂԱՏՆՏԵՍԱԿԱՆ ԱՐՏԱԴՐԱՆՔԻ ՀԱՄԱՊԱՏԱՍԽԱՆՈՒԹՅԱՆ
ՆՇԱՆ**

«Հայաստան օրգանական» տարբերանշանը հանդիսանում է հայկական օրգանական արտադրանքի հավաստման և նշագրման հիմնական խորհրդանիշը, որն ընդգծում է Հայաստանի մշակութային և ազգային ինքնությունը, ինչն արտահայտվում է նաև պատկերով՝ որպես պտղաբերության և հարստության ավանդական խորհրդանիշ:

Խորհրդանիշը - տարբերանշանի կենտրոնական հատվածում տեղադրված են երեք խուռ, որոնք խորհրդանշում են Հայաստանի բնորոշ ազգային պտուղներից մեկը՝ խուռը: Խուռը հայկական մշակույթում և պատմության մեջ ավանդաբար խորհրդանշում է առատությունն ու հաջողությունը, ինչպես նաև երկրի բերքատու և բնական ռեսուրսներով հարուստ լինելը: Նռների բազմությունը տարբերանշանի կենտրոնում ստեղծում է առատության և բարգավաճման պատկեր, ինչը համընկնում է օրգանական արտադրանքի գաղափարի հետ:

Գույնը - օգտագործված հիմնական գույները՝ կանաչ և կարմիր, ունեն հատուկ նշանակություն: Կանաչը ներկայացնում է բնության հանդեպ հարգանքն ու պարտավորվածությունը՝ խորհրդանշելով օրգանական գյուղատնտեսությունը և շրջակա միջավայրի պահպանությունը: Կարմիրը՝ նաև պտուղների գույնը, խորհրդանշում է Հայաստանի ուժը, ավանդույթները և այն հարուստ մշակութային ժառանգությունը, որից բխում է օրգանական արտադրանքի գաղափարը:

Գրվածքը - հայերենով գրված «Հայաստան Օրգանական» արտահայտությունը, ինչպես նաև "Armenia Organic" անգլերեն գրառումը, ամբողջացնում է տարբերանշանի ազգային ու միջազգային դիմագիծը՝ այն դարձնելով հասկանալի և ընդունելի ինչպես տեղական, այնպես էլ միջազգային շուկայում:

Շրջանակը - տարբերանշանն ունի կլորացված շրջանակ, որն ընդգծում է «կնիքի» գաղափարը, ինչը նշանակում է հավաստում և երաշխիք: Շրջանակի դիզայնը ստեղծում է պաշտոնականության և վստահության զգացում ցույց

տալով, որ «Հայաստան Օրգանական» տարբերանշանն իրականում հանդիսանում է օրգանական արտադրանքի հավաստագիր:

Կիրառումը - տարբերանշանի կենտրոնական գաղափարը հիված է Հայաստանի օրգանական արտադրանքը ճանաչելի դարձնելու վրա: Այս տարբերանշանը հուշում է, որ ապրանքը համապատասխանում է «Օրգանական գյուղատնտեսության մասին» օրենքի պահանջներին, անցել է համապատասխան ստուգումներ և ունի օրգանական գյուղատնտեսական արտադրանքի համապատասխանության սերտիֆիկատ: Նշանը, որը կներկայացվի օրգանական արտադրանքների վրա, հանդիսանում է հուսալիության և որակի բարձր ցուցիչ:

Հիմնական տարբերանշանը - հիմնական տարբերակը ներկայացված է կանաչ շրջանակով և կարմիր նշներով, նախատեսված է օգտագործման համար միայն բաց գույնի հիմնագույնի վրա՝ ապահովելով տարբերանշանի ճանաչելիությունն ու ընթերցելիությունը: Այս տարբերակն է առաջարկվում օգտագործել, երբ հնարավոր է կիրառել ամբողջական գունավոր տարբերակը՝ առանց համադրման խնդիրների:

Երկրորդական տարբերանշանը - երկրորդական տարբերակը նախատեսված է մուգ կամ կանաչ հիմնագույների համար, որպեսզի պահպանվի տարբերանշանի ընթերցելիությունը և տեսանելիությունը: Այս տարբերակում շրջանակը և տեքստը ներկայացված են սպիտակ գույնով, իսկ նշները մնում են կարմիր: Այս տարբերակը ստեղծվել է տեսանելիություն և ընթերցելիություն ապահովելու համար մուգ հիմնագույներով պիտակների կամ փաթեթավորման կիրառման դեպքում:

Միագույն տարբերակը - նախատեսված է այն դեպքերում, երբ տարբերանշանը տպագրվում է միայն մեկ գույնով՝ արտադրության կամ տեխնիկական պահանջների պատճառով:

Սպիտակ տարբերանշանը՝ մուգ հիմնագույնի վրա - կիրառվում է մուգ գույնի հիմնագույների վրա՝ տարբերանշանը դարձնելով ընթերցելի:

Կանաչ տարբերանշանը՝ բաց հիմնագույնի վրա - նախատեսված է բաց գույների վրա օգտագործելու համար:

Սև տարբերանշանը՝ բաց կամ մուգ հիմնագույնի վրա - նախատեսված է միագույն և բազմագույն տպագրությունների համար:

Սև տարբերանշանը՝ բաց հիմնագույնի վրա - տարբերանշանի սև գույնի տարբերակը նախատեսված է միագույն և բազմագույն տպագրությունների համար, որտեղ հիմնագույնը բաց է կամ սպիտակ:

Սպիտակ տարբերանշանը՝ մուգ հիմնագույնի վրա - տարբերանշանի սպիտակ գույնի տարբերակը նախատեսված է միագույն և բազմագույն տպագրությունների համար որտեղ հիմնագույնը մուգ է կամ պարունակում է մուգ գույնի պատկեր:

Տարբերանշանի անթույլատրելի կիրառումը - տարբերանշանի ձևի փոփոխությունները, գունային տարբերությունները կամ ակնհայտ փոփոխությունները խստորեն արգելվում են:

«Հայաստան օրգանական» տարբերանշանը հանդիսանում է պետական հավաստագիր և ճանաչելի խորհրդանիշ, որում արտահայտվում են Հայաստանի օրգանական արտադրանքի որակի չափանիշները և բնապահպանական հավատարմությունը: Տարբերանշանի օգտագործման ձևի փոփոխությունը կարող է վնասել դրա ճանաչելիությանը և արժեզրկել այն, ինչն ի վերջո կարող է տարակուսանք առաջացնել սպառողների շրջանում:

Գույները - տարբերանշանի գունային ներկապնակը հիմնված է երկու հիմնական գույների վրա՝ Արարատյան կանաչ և Նռան կարմիր: Տարբերանշանի գույները պետք է խստորեն պահպանվեն և օգտագործվեն համապատասխան գունային մոդելների՝ RGB, CMYK և HEX կոդերով:

RGB – նախատեսված է թվային կրիչների համար, օրինակ՝ կայքեր, սոցիալական մեդիա և այլ թվային հարթակներ: RGB գունային մոդելը լավագույնս ներկայացնում է գույների պայծառությունն էկրանների վրա:

CMYK – նախատեսված է տպագրության համար, ներառյալ փաթեթավորում, պիտակներ և ցանկացած տպագիր նյութեր: CMYK գունային մոդելն ապահովում է ճշգրիտ գույնի վերարտադրությունը տպագրության ժամանակ:

HEX – կիրառվում է վեբ դիզայնի և ցանկացած HTML կամ CSS կոդավորման համար: HEX գույնն ապահովում է գունային միատարրությունը թվային միջավայրում:

Նռան կարմիր

RGB: 232 / 39 / 62

CMYK: 0 / 100 / 80 / 0

HEX: #E8273E

Արարատյան կանաչ

RGB: 50 / 163 / 60

CMYK: 80 / 10 / 100 / 0

Տառատեսակ - տարբերանշանում կիրառվում են երկու հիմնական տառատեսակներ, որոնցից յուրաքանչյուրն ունի հատուկ նպատակ՝ ապահովելու թե՛ տարբերանշանի տեսողական ազդեցությունը, թե՛ տեխնիկական տեղեկությունների ընթերցելիությունը:

Braind Caption - Այս տառատեսակը օգտագործվում է տարբերանշանի հիմնական տեքստի համար, ընդգծելով բրենդի ինքնությունն ու ազգային առանձնահատկությունը: Այս տառատեսակը ներդաշնակ է տարբերանշանի գունային և տեսողական տարրերի հետ՝ փոխանցելով վստահության և հուսալիության զգացում:

Mardoto - Տառատեսակը կիրառվում է տեխնիկական տեղեկությունների համար, ինչպիսիք են հավաստագրի, սերտիֆիկատ տվող մարմնի մասին տեղեկատվությունը: Այս տառատեսակն ապահովում է հեշտ ընթերցելիություն՝ մանր տպագիր տեքստերի համար՝ պահպանելով բրենդի պրոֆեսիոնալ և պաշտոնական բնույթը:

Համատեղ կիրառում այլ տարբերանշանների հետ - տարբերանշանը կարող է կիրառվել այլ տարբերանշանների հետ, ինչպիսիք են՝ «ԵՄ օրգանական» տարբերանշանը: Համատեղ կիրառման դեպքում անհրաժեշտ է ապահովել, որ երկու տարբերանշաններն էլ ունենան համապատասխան տարածություն և հստակ տեսանելիություն՝ պահպանելով նրանց կիառման անհատական չափանիշները:

Հեռավորությունը - «Հայաստան օրգանական» և մյուս տարբերանշանների միջև տարածությունը պետք է լինի ոչ պակաս, քան տարբերանշանի ներքին սպիտակ շրջանի կեսը: Այս հեռավորությունն ապահովում է տարբերանշանների ինքնուրույնությունը և ընթերցելիությունը՝ կանխելով նրանց միաձուլումը:

Զափսերը - համատեղ օգտագործման ժամանակ «ԵՄ օրգանական» կամ այլ տարբերանշանների բարձրությունը պետք է լինի փոքր-ինչ փոքր «Հայաստան օրգանական» տարբերանշանից: Մասնավորապես, այդ բարձրությունը որոշվում է տարբերանշանի ծաղկային դիզայնի ստորին կետի մակարդակից:

Սերտիֆիկացման տեղեկատվության տեղադրում տարբերանշանի հետ - «Հայաստան օրգանական» տարբերանշանի կողքին կամ ներքևում պարտադիր է նշել հավաստագրման վերաբերյալ տեղեկատվությունը՝ նշելով հավաստագրող մարմնի իրավաբանական անվանումը: Տեղեկատվությունը կարող է տեղադրվել տարբերանշանի բոլոր կողմերում, սակայն առավել ցանկալի է այն տեղադրել աջ կողմում՝ հորիզոնական դիրքում, կամ անմիջապես ներքևում՝ ուղղահայաց դիրքում: Հորիզոնական դիրքի դեպքում տեքստի բարձրությունը պետք է կազմի տարբերանշանի բարձրության 40%-ից մինչև 50%-ը՝ ապահովելով համաչափություն:

Սերտիֆիկացման տեղեկատվության տեղադրում տարբերանշանի հետ, ուղղահայաց կիրառում - ուղղահայաց դիրքում տեքստը պետք է կազմի տարբերանշանի բարձրության 20%-ից մինչև 40%-ը՝ պահպանելով տարբերանշանի և տեղեկատվության միջև համաչափ տեսողական հավասարակշռությունը:

Կիրառման օրինակներ - «Հայաստան օրգանական» տարբերանշանը պիտակների վրա օգտագործելու ժամանակ անհրաժեշտ է հետևել որոշակի չափորոշիչների, որոնք ապահովում են դրա ճանաչելիությունը և ընկալելիությունը: Տարբերանշանը պետք է լինի պարզ և հստակ, անկախ այն ձևից կամ չափից, որտեղ այն կիրառվում է:»:

Հայաստանի Հանրապետության

վարչապետ՝

Ն.

Փաշինյան